

Nunat assigiinngitsut akornanni timmisartuni atortussiatigut isumannaatsuunissamik pisinnaatitaaffeqarnermut inatsisip Kalaallit Nunaanni atuutilersinneqarnissaanik peqqussummik Kalaallit Nunaanni Namminersorlutik Oqartussat akuersissuteqarnissaat pillugu Inatsisartut aalajangiiffigisassaattut siunnersuut
(Ineqarnermut Attaveqaasersuutinullu Naalakkersuisoq)

Saqqummiussissut

(Ineqarnermut Attaveqaasersuutinullu Naalakkersuisoq)

Siullermeerneqarnera

Cape Town-isumaqatigiissummut, tassungalu allassimaffimmut atasumut Kalaallit Nunaata ilaalernissaa, aalajangiiffigisassatut siunnersuutitigut matumuunakkut Naalakkersuisut kissaatigaat. Tamanna nunat assigiinngitsut akornanni timmisartuni atortussiatigut isumannaatsuunissamik pisinnaatitaaffeqarnermut inatsimmut peqqussutitigut pissaaq. Tamanna pillugu Naalakkersuisut siornatigut Danmarkimi Justitsministeriamut kissaateqarnikuupput, tamannalu tunuliaqutaralugu siunnersuut saqqummiunneqarluni.

Nunat tamalaat akornanni assigiiaamik inatsisitigut sinaakkuteqartitsinissaaq, Cape Town-isumaqatigiisut, tassungalu atalluni allassimaffiup pingaarnertut siunertaraat.

Timmisartuni atortussianik pisinermut, aningaasaliinermullu atatillugu aningaasaliisut isumannaatsuunissamik pisinnaatitaaffiisa (assersuutigalugu qularnaveeqqusiinermi pisinnaatitaaffiisa) illersorneqarnissaat isumaqatigiisut siunertaraa.

Timmisartuni atortussianut aningaasaliinermut atatillugu aningaasaliisut qularnaveeqqusiissaat isumaqatigiisutitigut illersorneqartarput. Tamanna qulimiguulinnut, suluusalinnullu atuuppoq. Aningaasaliisup isumannaatsuunissamik pisinnaatitaaffimminik nunat tamalaat akornanni nalunaarsuiffimmi nalunaarsuisitsisinnanera iluaqutitaraa. Taamaalilluni nalunaarsuineq taanna timmisartuni atortussiami aningaasanik pisassalini allani salliutinneqassaaq.

Aningaasaliisup isumannaatsuunissamik pisinnaatitaaffini nunami pisinnaatitaaffinnut nalunaarsuiffimmut taamaallaat nalunaarsorsinnaappagit, tamanna illersorneqarnissap nalorninarneranik aningaasaliisumit misinnarsinnaavoq.

Nunani allani timmisartortitseqatigiiffiit Kalaallit Nunaannukarusuttut imaluunniit Kalaallit Nunaanni timmisartortitserusuttut eqqarsaatigalugit unammilleqatigiittoqassappat, Kalaallit Nunaanni timmisartortitseqatigiit naligititaalernerinik tamanna kinguneqassaaq. Kalaallit Nunaat isumaqatigiisummut ilaaleraluaruni, isumaqatigiisut allassimaffillu timmisartortitseqatigiiffinnut sipaaruteqartitsisinnaavoq.

Taamatut oqaaseqarlunga aalajangiiffigisassatut siunnersuut Inatsisartuni kajumittumik
suliassanngorlugu tunniuppara.